

Duzmoed Baenzlawz "Doxgangj"

贵港市覃塘区蒙公镇高占小学三年级 Luz Baujcu/陆宝珠



Ngoenzneix, gou gwn ngaiz liux le, mbouj miz saeh, couh youq henz bakdou hung naengh dwk gwn bingj. Mbiengj bingj ndeu doek youq gwnz namh, gou mbouj leix de. Mbouj gvaq yaep ndeu, gou

yawjaen miz song duz moed iq youq gwnz mbiengj bingj raih bae raih dauq. Gou siengj, song duz moed iq neix daj gizlawz dauj baenzneix vaiq ne? Gou cingq siengj, fwt raen bang moed iq ndeu raih gvaqdaej, gonqlaeng mbouj luenh dwk dawz mbiengj bingj haenx buen haeuj congh bae lo. Yenzlaiz dwg duz moed iq ndeu caeux couh bae ndaw congh ra doih dauj.

Seizneix, ndaw ukgyaeuj gou miz aen vwndiz ndeu: Duz moeg iq mbouj rox gangjavah, dwg baenzlawz lwnh gyoengq doih dauj buen gigwn ne?

Gou gietdingh dawz mbiengj bingj ndeu ndek youq giz wng bae. Mbouj geij nanz, youh miz duz moed iq ndeu raih gvaqdaej lo, menhmenh dwk, duzmoed yied dauj yied lai lo. Gou sijsaeq baez yawj, yawjaen duzmoed aeu gaeu iq dauj, mwngz doed gou, gou doed mwngz, baenz lai "vunz" guhhong, boiqhab ndaej ndei lai ha: Gyoengqde

nyaengq youh mbouj luenh, couh lumj miz vunz vixyinx ityiengh, gig vaiq couh ndeindei dawz mbiengj bingj buen haeuj ndaw congh bae lo. Gou sikhaek haeujsim cimyawj gaeu iq gwnz gyaeuj duzmoed, hoeng, duzmoed youh dwg baenzlawz yungh gaeu "gangjavah" ne?

Gou siengj haujlai nanz, dauqdaej siengj hwnjdaej lo, bingzseiz yawj gvaq bonjsaw 《Cib Fanh Aen Vih Gijmaz》, gou rox lo: Duzmoed mbouj rox gangjavah, hoeng, gyoengqde rox aeu doiq gaeu doed bae doed dauq, doxcienz gak cungj saenqsik, neix couhdwg gij vah gyoengqde, gij vah mbouj fatsing gyoengqde, neix couhdwg fouz sing cix beij miz sing ndei, neix caen hawj gou byaengq lwgda, raen seiqmiemh ha!

Gyoengq doengzhag, sou seizneix rox gij laeglemx duzmoed gangjavah luba! Caen mizyinx!

(lauxsae son'gyauq: Cinz Limingz/陈丽明)

Gij Gyaez Daxbuz


Biekbya mbouj dwg gigwn ceiq ndeigwn, hoeng dwg gigwn gou ceiq maij. De mbouj beij nohbya singisien baenzgwn, mbouj beij gagaeq feihdauh noengz, mbouj beij gigwn ndawhaij lwenqda, hoeng de ciengxlwenx dwg gigwn ceiq ndeigwn. Aenvih de hawj gou rox miz gij gyaez daxboh noengzna.

Ngoenz haenx, gou geiq ndaej cingcu dangq-maz, dwg banhaemh seizdoeng, aenmbwn laepngaungau ne, fwj-ndaem rim mbwn, seiz mbouj seiz doek geij naed fwn.

Cuengqhag lo, baihnaj dou hagdangz cungj dwg gyoengq bohmeah dauj coux lwnyez. Gou doidoi nyoengx-nyoengx saenx gvaq gyang vunz lai bae. Youq ndaw rumz, boux vunz dasug ndeu cingq ndwn youq gizhaenx, ndangdaenj caeuq byoem cungj deng rumzhung ci le hwnjhwnj roengzroengz. De lumjnaeuz dwg yawjaen gou lo, lej buet dauj coh gou, gou hix yamq hung byaij bae coh de.

"Nit lwi? Gvaqdaej daenj geu ndangdaenj ndeu." Daxbuz yousim dwk muengh yawj gou, daj ndaw daeh fwngzswix gaem haenx dawz ok geu buhraizgek ndeu ndenq hawj gou. "Daehsaw ce gou aemq!" De dawz aen daehsaw gou roengz gwnz mbaq gou dauj, aemq coq baihlaeng de.

Gou dued daehsaw dauq, naeuz: "Gou gag aemq la!" "Mwngz dwg mbouj



dwg nyinhnaeuz daxbuz geq lai? Naj nyaeuz lo? Mbouj miz yungh lo?" Gou raen daxbuz aen lwgda geq de ronghrikrik nei, gig ndatcingz dwk yawj gou.

"Mbouj, mbouj, mbouj dwg, mwngz aemq ba." Gou guhmuengz naeuz.

Daxbuz doiq gou riuriu le naeuz: "Dungx iek luba? Dauj, gwn biekbya!" Gangj seizhaenx lumj miz fapfangz dwk daj ndaw rungj de yut ok aen biekbya gaenq gyoet gvaq, "Gyoet gvaq mbw!" Daxbuz gangj seizhaenx aeu fwngz upup le biekbya, youh hah song gaemz heiqndat coq de, ndenq daengz ndaw fwngz gou. Ciep ndaej aen biek gyoet, gou lejlej haeb song gaemz, hoeng raen de raeuj dangqmaz, baenzgwn raixcaix.

De beij nohbya lai singisien baenzgwn, beij gagaeq feihdauh lai noengz, beij gigwn ndawhaij lai lwenqda. Gigwn gou ceiq gyaez gwn haenx dwg biekbya! De sawj gou ciengxlwenx geiq maenh gij gyaez daxbuz.

(Cuh Cwzyenz raiz Daenggingh hoiz)

Soujbyauj "Loek" Lo

Bineix seizdoeng gou cungj caj mbwn doek nae, caj haujlai haujlai nanz, mbwn doek nae lo! Gou lwnh daxboh, gou siengj okbae caemz nae. Daxboh ngaekgyaeuj lo, daengq gou gag yawj soujbyauj, aeu youq banringz cibngeih diemj cibhaj faen dauq daengz ranz.

Gou youq ndaw siujgih caemz nae caemz ndaej angq dangqmaz, danhseih ndawsim dingj geiq seizlawz dauqbae ranz. Gou baez daih'it yawj soujbyauj, soujbyauj dwg cibngeih diemj lingz caet faen. Gou caemz yaep ndeu, liuxle baez yawj soujbyauj lij dwg cibngeih diemj lingz caet faen. Gou youh caemz yaep ndeu, liuxle baez daihsam yawj soujbyauj, baenzlawz lij dwg cibngeih diemj lingz caet faen? Gou hoz ngeix: Seizgan daengz luba? Baenzneix couh ndei lai! Gou ndaej dingj caemz nae lo! Gou buet bae buet dauq gip ngeiqfaex gwnz nae, sawqmwh daxboh hozndat fozfoz buet gvaqdaej. Daxboh doiq gou naeuz: "Yawj soujbyauj mwngz geijlai diemj! Guhlawz caengz bae ranz? Daxmeh mwngz naeuz caiq mbouj bae ranz couh ndaq mwngz lo!" Gou guhmuengz yawj le yawj soujbyauj, lij dwg cibngeih diemj lingz caet faen. Gou ndenq soujbyauj hawj daxboh yawj le, naeuz: "Soujbyauj dingj dwg cibngeih diemj lingz caet faen ha!"

Daxboh yawj le baez ndeu, naeuz: "Ya! Soujbyauj dwg mbouj dwg vaih gvaq?" Liuxle, gou caeuq daxboh doengzcaez dauqbae ranz lo.

Dauq daengz ranz, gou baez yawj cungvenj, yo? Cungvenj dwg cibngeih diemj samcibroek faen. Gou hoz ngeix: Haenq lai bw! Caeklaiq dwg soujbyauj "loek", mboujne gou couh deng ndaq lo.

(Ouhyangz Linzyinz)

